

INTSUMISIOA. «Indultua eskatzea soilik nahitaezko soldadutzaren kontra gaudela onartzea izango litzateke»

Intsumiso presoek ez dute eskatuko indultua, eginikoaz «harro» daudelako

Espainiako Gobernuak «Armadaren profesionalizazioaren kontrako disidentzia isilarazi» nahi duela salatu dute

Agentziak | MADRIL

Egun espetxean dauden Hego Euskal Herriko eta Espainiako intsumisoek atzo iragarri zuten, ez dute eskatuko indultua; egindakoaz «harro» daudelako eta horixe bera delako Espainiako Gobernuak nahi duena. Angel Acebes Jusitizia ministroak herenegun adierazi zuenez, indultua eskatzen duen intsumisoak Gobernuaren aldeko jarrera izango du, eta lege aldatetaren tramitazioa amaitu aurretik aterako da kartzelatik.

Beren jarrera azaltzeko, prentsaurrekoa eskaini zuten Madrilén, Espainiako Defentsa Ministerioaren egoitzaren aurrean, KEM Kontzientzia Eragozpenaren Mugimenduko kide diren Euskal Herriko hiru intsumiso preso —Javier Rodríguez Hidalgo, preso dagoen laugarren intsumiso bizkaitarra, 2. graduan dago, eta ezin daiteke atera espetxetik—.

Alberto Estefaniak, Ander Eigurenek eta Jose Ignacio Royok indultu edo barkamen eskaerarik ez dute aurkeztuko, eta Espainiako Gobernuak bere kabuz askatu arte itxarongo dute espetxetik ateratzeko. «Indultua eskatzea soilik nahitaezko soldadutzaren kontra gaudela onartzea izango litzateke», adierazi zuen Estefaniak komunikabideen aurrean, eta beren borroka urrunago doala gaineratu.

Intsumisio eta desertzio delituak zigorgabetzea Espainiako Gobernuak «bere burua zurrizteko egindako maniobratzat» jo zuten. «Armadaren profesionalizazioaren bidean disidentzia isilarazi nahi izan dute», adierazi zuen Jose Ignacio Royok. «Baina, haien asmoa mugimendu antimilitarista desmobilizatzea bada, oso oker daude; Armada, gerrak eta gastu militarrek lekuri ez duten gizartea eraikitzea baita mugimendu antimilitaristaren helburu bakarra». «Hori lortu arte, espetxea da gure lekua», gaineratu zuen Alberto Estefaniak.

«Armada desagertzeko bidean»

Bestalde, Espainiako Gobernuak herenegun profesionalizazioaren inguruan esandakoa ere hartu zuten ahotan intsumiso presoek. «Profesionalizazio-



SERGIO BARRENETXEA / EFE

Guardia Zibilak prentsaurrekoa ematea galarazi zien atzo Alberto Estefania, Ander Eiguren eta Jose Ignacio Royo intsumiso bizkaitarrei.

Erreserbara pasatzeko aginduak birziklatu dituzte intsumisoek



JON HERNÁEZ / ARGAZKI PRESS

aren aurreikuspenak betetzea soldaduen aurreikuspena heren bat jaistea, plaza bakoitzeko 0,4 eskaera jasotzea eta Armada uzten dutenak bertan sartzen direnak baino gehiago izatea

baldin bada, zortea opa diegu, Armada desagertzea izango baita hurrengo urratsa», adierazi zuen Royok.

Hirugarren graduan dauden hiru intsumiso presoek Defen-

tsa Ministerioaren aurrean egin nahi izan zuten agerraldi publikoa, Espainiako Gobernuaren erabakia aztertu eta beren jarraitzaileen berri emateko. Defentsa Ministerioan, baina, Guardia

Madrilgo Defentsa Ministeriotik hainbat intsumisori erreserbara pasatu direla jakinarazteko igorritako agiriak birziklatu egin zituen, atzo, Kontzientzia Eragozpen Mugimenduko (KEM), Bilboko Gobernu Militarraren atarian egin zuen ekin-tza baketsuan. Bertan kolore horiko makina erraldoi bat jarri zuten, eta birziklagailu antimilitaristak konfeti bihurtu zituen agiri ofizialak. Konfeti Armada profesionalaren porrota ospatzeko egin zuten jaian erabili zuten antimilitaristek. «Ekintza horren bidez, Armadaren kontrako jarrera agertu nahi dugu argi eta garbi, eta, era berean, instituzio militarrekiko edozein harreman desobeditu egingo dugula jakinarazi nahi diogu», azaldu zuten KEMeko kideek.

Zibilak galarazi egin zuten prentsaurrekoa ematea. Mahaiaren eserita zeudela, lekutik mugiarazi zituzten, eta ezin izan zuten prentsaurrekoa aurretik pentsatu bezala eman.